



Komunikadu Imprensa
02 Agostu 2024

Suku Lifau - JSMP asina no lansa regra tara-bandu alteradu
Partisipante sira : regra tara-bandu alteradu hatan duni preokupasaun
komunidade nian

Iha 29 Jullu 2024, estrutura Suku Lifau, Sub-rejiaun Pante-makasar, Rejiaun Administrativa Espesiál Oekusi-Ambeno (RAEOA) asina no lansa regra tara-bandu alteradu dahuluk iha Sede Suku Lifau. Antes ne'e, iha 20 Juñu 2024, JSMP ho The Asia Foundation (TAF) fasilita ona konsultasaun ba regra tara-bandu ne'e.

“Ita tama ona ba faze finál hosi prosesu naruk ne'ebé envolve diskusaun no konsultasaun lubuk ida ho autoridade suku, OPS no membru comunidade sira, mézmuke iha difikuldade maibé konsege halibur idea no hanoin hodi asegura regra refere refleta duni nesesidade, kondisaun réal no liuliu lisan comunidade iha Suku Lifau nian. Tanba ne'e, lori JSMP nia naran hato'o agradesimentu wain no apresiasaun aas ba parte hotu nia apoiu, liuliu autoridade suku ne'ebé prepara ona regra ida-ne'e,” dehan Sr. Casimiro dos Santos, Jestór programa JSMP.

Jestór programa ne'e hatutan katak regra tara-bandu ne'e la'os regra ka mekanizmu úniku ne'ebé autoridade sei uza hodi rezolve problema maibé nafatin nakloke hodi uza sistema justisa formál tanba konsidera regra tara-bandu ne'e hanesan regra komplementár de'it ba prosesu justisa formál ne'ebé eziste.

Nune'e mós, Xefe Suku Lifau iha nia intervensaun agradese wain tebes ba JSMP tanba bele fasilita no halo ona revizaun ba regra tara-bandu Suku Lifau nian no mós ho informasaun sira ne'ebé fahe ona hosi JSMP bele redús problema sira iha suku laran.

“Agradese tebes ba JSMP tanba regra ida ne'e di'ak tebes no bele fasilita ami estrutura suku atu rezolve problema comunidade nian iha Suku Lifau. Antes ne'e, comunidade Suku Lifau iha kazu barak maibé ho prezensa JSMP nian bele redús ona problema iha sira nia família no comunidade, tanba JSMP fasilita dezeminaun informasaun, diálogu komunitária no treinamentu sira kona-ba asesu ba justisa formál,” dehan Sr. Delfino Sole, Xefe Suku Lifau.

Xefe suku haktuir liután katak ho reativa regra tara-bandu ne'e bele fasilita no hafasil liután estrutura suku no aldeia sira atu halo mediasaun ba problema comunidade nian iha Suku Lifau.

Iha intervensaun Komandante PNTL RAEOA, haktuir katak regra tara-bandu la'os foin mak iha, maibé desde tempu bei-ala sira ne'ebé ho objetivu atu comunidade sira moris respeita malu no fiar malu, no prezensa JSMP nian atu

hadi'ak liután regra tara-bandu ne'e no observa nia implementasaun sira, liuliu problema comunidade sira nian ne'ebé estrutura suku sira rezolve iha suku no aldeia. Nia hatutan katak iha Oekusi kazu violénsia doméstika rezista aas tebes, espera ho prezensa JSMP nian bele apoiu diak liután estrutura suku sira hodi rezolve problema comunidade nian ne'ebé dala barak tanba deit kazu animal tama kintal lori hotu ba iha polísia tanba ne'e nia parte husu ba estrutura suku identifika didi'ak kazu sira antes lori ba iha justisa formál tanba dalaruma kazu balun bele rezolve iha suku. Maibé krime públiku la bele hamate iha nivel suku tanba krime públiku kompeténsia tribunál nian atu bele deside, nune'e husu atu refere ba iha tribunál.

Komandante ne'e mós husu ba JSMP atu kontinua nafatin monitoriza implementasaun regra tara-bandu ne'e, nune'e karik iha implementasaun mak akontese naksala ruma bele fó sujestaun no hanoin sira ne'ebé di'ak.

Iha tempu hanesan, eis Xefe Suku, Sr. Lazaro Quenat iha ninia dadalia ho JSMP rekoñese katak regra tara-bandu ne'e hetan mudansa di'ak tanba intervensaun no ajuda hosi programa JSMP ne'ebé akomoda comunidade sira hotu nia hanoin iha prosesu revizaun.

Nia dehan "Hau fiar metin katak implementasaun regra tara-bandu ida-ne'e sei efektivu liu tanba estrutura suku inklui comunidade sira kumpriende di'ak kona-ba konteudu hosi regra tara-bandu ida-ne'e tanba estrutura suku no comunidade sira envolve direta iha prosesu tomak, no ida ne'e la ses hosi apoiu JSMP nian".

Katekista bairru Oemolo, Sr. Jose Tani iha ninia dadalia ho JSMP mós konsidera regra tara-bandu versaun alteradu hatan duni ba preokupasaun comunidade durante ne'e.

"Regra tara-bandu ne'ebé foin reativa ne'e kapa'as no tuir duni comunidade nia kondisaun no preokupasaun durante ne'e tanba regra anterior hatuur kustu no sansaun boot ne'ebé difikulta comunidade sira hodi rezolve sira nia kazu iha sira nia suku no maioria comunidade mak tenke lori sira nia kazu ne'e ba tribunál maski kazu sira ne'e loloos bele rezolve iha nivel suku. Tanba ne'e, agradese tebes ba JSMP ba apoia tomak ne'ebé oferese ba Suku Lifau," dehan Sr. Jose Tani, Katekista Bairru Oemolo.

Partisipante sira ne'ebé partisipa iha serimónia asinatura ne'e hamutuk ema nain 34 ne'ebé kompostu hosi feto 5 no mane 29. Partisipante sira ne'e kompostu hosi Komandante PNTL RAEOA ho nia ajente sira, representante Administradór Sub-rejiaun Pante-Makasar, xefe suku, lia-nain, xefe aldeia sira, OPS, katekista, representante feto no mane, no comunidade Suku Lifau.

Atividade ne'e realiza hosi JSMP liuhosi Programa Apoiu Seguransa Komunitáriu (PASK) tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor-Leste.

Atu hetan informasaun kompletu, favor kontaktu:

Ana Paula Marcal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl